



11 APR, 2026

Guna skim ToU jimat bil elektrik

Kosmo, Malaysia



Guna skim ToU jimat bil elektrik

PETALING JAYA – Rakyat digalakkan beralih kepada skim *Time of Use* (ToU) sebagai langkah praktikal untuk menjimatkan bil elektrik dan memperkukuhkan kecekapan penggunaan tenaga negara dalam menghadapi ketidakpastian harga tenaga global ketika ini.

Kementerian Peralihan Tenaga dan Transformasi Air (PETRA) dalam satu kenyataan berkata, seramai 128,868 pengguna telah beralih kepada skim ToU, setakat Februari lalu.

Katanya, ia sekali gus mencerminkan peningkatan kesedaran rakyat terhadap kepentingan pengurusan tenaga yang lebih efisien.

Ujarnya, pendekatan penggunaan tenaga secara lebih bijak melalui skim ToU memberi peluang untuk pengguna menikmati kadar tarif elektrik lebih rendah pada waktu luar puncak berbanding waktu puncak, secara langsung membantu penjimatan melalui perubahan corak penggunaan harian.

“Waktu puncak lazimnya membabitkan tempoh permintaan elektrik yang tinggi pada hari bekerja, iaitu antara jam 2 petang hingga 10 malam

dengan kadar tarif lebih tinggi.

“Waktu luar puncak pula merangkumi tempoh permintaan elektrik lebih rendah seperti waktu malam hingga pagi, hujung minggu dan cuti umum, menawarkan kadar tarif lebih rendah.

“Perbezaan kadar ini memberi insentif kepada pengguna untuk merancang penggunaan elektrik secara lebih efisien,” jelas kenyataan itu.

Katanya, melalui skim ToU, pengguna boleh mengalihkan aktiviti berintensiti tenaga seperti penggunaan penyaman udara, mesin basuh, serta pengecasan kenderaan elektrik ke waktu luar puncak.

“Pendekatan ini bukan saja membantu mengurangkan bil elektrik, malah menyumbang kepada penggunaan tenaga lebih cekap,” katanya.

Ujarnya, kerajaan melihat skim ToU sebagai antara inisiatif penting dalam membantu rakyat mengawal dan mengurangkan perbelanjaan bil elektrik, menggalakkan penggunaan tenaga lebih cekap serta mengurangkan beban permintaan elektrik di waktu puncak.



PENGGUNA digalakkan menggunakan skim ToU untuk menjimatkan penggunaan elektrik.